

Castigonan pa abuso di mucha ta wordo duna a base di pruebanan cu keda presenta na Corte

ULTIMO dianan ta hopi den noticia e delito di abuso sexual di menornan di edad. E ta algo cu semper tabatin atencion di ciudadanonan. Hopi biaha ta cuestiona e castigo cu un acusado ta ricibi na final di tratamento di su caso. E castigo cu ta wordo impone ta depende principalmente di pruebanan cu ta wordo presente.

Esey ta un asunto tambe cu a wordo puntra na Huez mr. Debby Angela, encarga cu prensa, kende a presenta e relato anual di Corte, pa loke ta aña 2015.

El a bisa cu no mester tin duda algun cu Hueznan den Corte di Prome Instancia na Aruba ta na altura di e inkietud cu ta biba den comunidad pa loke ta castigonan cu ta wordo duna den casonan penal conoci como “zedenzaak” of abuso sexual.

Huez mr. Debby Angela den un declaracion duna a splica cu esnan di Corte ta sigui tur sentimiento cu ta keda publica den medionan di comunicacion y a mostra cu nunca tur hende lo keda contento cu castigonan cu Corte lo impone riba nan pa violacion di ley penal. Pero principalmente cerca famia di e victi-

manan den e tipo di casonan aki, nunca ta keda contento cu e castigo cu ta wordo duna n'esnan cu a comete abuso contra nan sernan keru.

E desaroyo aki a pone cu enberdad Hueznan a cuminsa analisa e castigonan cu ta wordo duna den e tipo di casonan aki, y el a bisa si cu ningun castigo ta mucho abou ya cu den e tipo di casonan aki, mester impone un castigo a base di pruebanan cu ta ser presenta na Corte y pruebanan concreto y legal.

Den e tipo di casonan di abuso sexual di menor mester tuma na consideracion pruebanan concreto cu ta ser presenta na Corte y esakinan ta cardinal na momento di trata un caso penal, ya cu ora cu e casonan aki yega Corte, e pruebanan mester ta suficiente y concreto. Sinembargo na momento cu esaki no t'e caso, no por impone un castigo sin mas contra di un acusado y tin ora ta dificil pa simplemente impone un castigo sin cu ta tuma na consideracion cu e pruebanan concreto cu tin den e casonan aki.

Mr. Angela a sigui mostra cu tin casonan cu ta cay bou di zedenzaak manera e.o. un caso di un relacion amoroso entre un mucha muher di 15 aña y un mucha homber di 22 aña ya cu na momento cu nan tene relacion sexual, esaki ta castigabel pa ley.

Den e caso aki ta hunga un rol importante cu e dos personanan aki ta stima otro, nan tin un relacion solido y serio caminda na momento cu keho drenta di parti di famianan den e tipo di casonan aki, mester tuma na consideracion cu sentimento di esnan envolvi tambe ta hunga un rol importante.

Ta bisto cu den un caso asina impone un castigo di dos aña di prison, simplemente no ta hustificay

tur esaki tin cu wordo tuma na consideracion.

El a mostra cu den analisis y inventarisacion haci den zedenzaken, e castigonan cu a wordo duna, ningun momento ta mucho abou y aki comunidad tin cu compronde cu castigonan ta wordo duna a base di loke a wordo proba y e aspecto aki ta masha importante.

E tipo di casonan aki ta keda sumamente delicado y enberdad ta masha sensitivo den comunidad, pero tambe ta un hecho cu na momento cu Ministerio Publico haya cu un castigo impone ta mucho abou, tin otro caminda pa cana e.o. di Corte Superior y despues hasta por bay Hof cu e casonan aki.

Huez mr. Debby Angela a mostra cu un Huez tambe por faya, pero den e tipo di casonan aki tur hende por bay Hoge Raad pa sigui busca nan derecho, pero sin duda Corte no ta haya cu castigonan duna den e tipo di casonan aki ta mucho abou manera tin e impresion den comunidad n'e momentonan aki.

El a splica tambe cu Corte ta actua a base di pruebanan cu ta wordo presenta y a mostra cu ora ta papia di casonan di abuso sexual, ta un acusacion serio cu mester tin prueba concreto cu ta confirma cu e abuso aki a wordo cometi. Den Reino Hulandes no ta existi castigo minimo y entre otro na Corsou cu tabatin esaki, el a wordo anula ya cu den cierto caso e no tabata hustifica y na Hulanda tampoco esaki t'e caso. Hecho ta keda cu na momento c'un caso asina yega na Corte, e caso ta wordo trata na loke e investigacion a logra di prueba y ta a base di e pruebanan aki Corte por

imponer un castigo y si esaki no t'e caso, ta dificil pa bay duna un castigo m a s pisa.

